


真土法象



道藏輯要

真土詩曰

金液還丹印證圖詩

六

胃集十一

先天一炁號真鉛莫信迷徒妄指傳萬化滋張緣朕兆一靈飛
走賴拘鈐有形生質皆非正無質生形始是玄寄語道流勤學
取用鉛莫錯用凡鉛

真土者真鉛真汞也鉛汞者太極初分先天之炁也先天炁
者龍虎初弦之炁也此炁生於天地之先產於虛無之內非
可見可聞後天地生涕唾精津氣血液及凡砂凡汞銀鉛礬
硫雌雄礪膽五金八石有中生有渣滓之物也邪師偽徒狂
妄指傳以是為道費耗資財終無有成者良可笑也殊不知
金丹之道亦猶萬物皆因朕兆既萌之後以生以長譬以真

鉛真汞配居金鼎之中牢固拘鈐不能飛走無質生質結成
黃芽始是玄妙豈可認彼有形有質之物而爲真鉛真汞耶
仙翁令人辨此真土乃是同類有情之物龍虎二入初弦之
炁方可結胎方能發生莫以凡鉛凡汞認作真鉛真汞也仙
翁言之盡而明之至矣世人可不諦思之乎

道藏輯要

金液還丹印證圖詩

七

胃集七